

KOMUNIKADU IMPRENSA

Governu Timor-Leste liuhusi Ministériu Planu no Ordenamentu ho Governu Austrália Lansa Relatóriu kona-ba Jéneru no Inkluzan Sosiál iha Projetu Infraestrutura Públika sira iha Timor-Leste

Díli, Sala Maubara, 11 Outubru 2022 – Governu Timor-Leste lansa relatóriu kona-ba Jéneru no Inkluzan Sosiál iha Infraestrutura Públika sira iha Timor-Leste. Relatóriu ida ne'e foka ba sentralidade setór infraestrutura públika Timor-Leste nian ne'ebé sei hasa'e rezultadu kresimentu ekonómiku no desenvolvimento ne'ebé sustentavel, inklui ligasaun entre ema sira iha servisu públiku importante sira ba asuntu edukasaun, saúde, merkadu no empregu sira.

Relatóriu ida ne'e fornese revizaun komprehensivu ida ba síkulu moris infraestrutura nian ho rekomendasaun sira ne'ebé bazeia ba prátika di'ak liu tuir padraun internasionál nian no mós dezafiu sira ne'ebé iha ona, no oportunidade sira ne'ebé espesífiku ba Timor-Leste. Rekomendasaun sira ne'e inklui ba asaun iha tempu badak no naruk nian. Maneira ida ne'e sei fó dalan ba Governu Timor-Leste atu konsidera esforsu tempu badak nian, no iha tempu hanesan konsidera mós intervensaun ba iha tempu naruk nian.

Rekomendasaun relatóriu kona-ba Jéneru no Inkluzan Sosiál ida ne'e sei kontribui ba Governu Timor-Leste nia objetivu ne'ebé foka ba **“la husik ema ida iha kotuk”** iha infraestrutura públika. ‘La husik ema ida iha kotuk’ signifika Governu sei fó apoiu ema hotu ne'ebé mai husi orijen no kultura diferente iha prosesu desenvolvimento nasaun ida ne'e nian. Ida ne'e inklui grupu vulneravel sira hanesan grupu feto, labarik feto sira, ema ho deficiente, no idozu sira.

Relatóriu ida ne'e reforsa Governu Timor-Leste nia komitmentu bazeia ba Deklarasaun rua Maubisse nian. Iha tinan 2015, Governu Timor-Leste kometidu bazeia ba Deklarasaun Maubisse Dahuluk atu promove no empodera sosio-ekonómiku feto sira nian. Iha Outubru 2018, Governu Timor-Leste adopta Deklarasaun Maubisse Daruak nian ne'ebé inklui

komitmentu atu hadi'ak feto rurál sira-nia moris to'o 2023, liuhusi dezvoltimentu infrastrutura.

Preparasaun relatóriu Jéneru no Inkluzan Sosiál iha Infrastrutura Públiku iha Timor-Leste lidera husi Ministeriu Planu no Ordenamentu liuhusi Ajénsia Dezenvolvimentu Nasionál (ADN, I.P.) no Sekretária Estadu ba Igualdade no Inkluzan nian. Governu Austrália, liuhusi Programa Parseria ba Infrastrutura (P4I), orgullu apoiu ona Governu Timor-Leste iha preparasaun relatóriu ida ne'e nian.

Informasaun detallu bele asesu iha www.adn.gov.tl

Remata